


# Publicaziun nova 1997

Cudesch da documents grischun, tom III (nov), 1273–1303

■ (sp) Ils 19 da december vegn preschentada a Cuira ina impurtanta publicaziun nova sin il sector da la perscrutaziun da l'istorgia grischuna. I sa tracta dal novredigi III. tom dal cudesch da documents grischun, in'ediziun da lunga istorgia. L'onn 1937 ha la societad istorica antiquara dal Grischun concludì d'edir in cudesch da documents. L'ovra avess duì cumpigliar ils documents che pertutgan il Grischun davent da l'origin dal uvestgieu da Cuira enturn l'onn 400 fin als artitgels da Glion da 1526. L'onn 1955 è il I. tom cumpari, redigi d'Elisabeth Meyer-Marthaler e da Franz Perret cun ils documents da 390 fin 1199, e 1973 è il II. tom cumpari che cumpiglia il temp da 1200 fin 1273. Il III. tom è vegni terminà be fin la 4. furniziun e finescha cun l'onn 1300. Quest tom parzial è vegni cumpletà l'onn 1985 cun registers ed è uschia terminà.

Il cudesch da documents grischun è restà vinavant in grond desideri da la perscrutaziun istorica grischuna. Sin proposta da la societad istorica antiquara ha la Regenza grischuna concludì l'onn 1989 da cuntinuar cun l'ovra. Sco redactors èn vegnids engaschads *Lothar Deplazes* ed *Otto P. Clavadetscher*. La finanziaziun dal cudesch da documents grischun è vegnida pussibilitada entras il chantun Grischun ed entras considerablas contribuziuns dal fondo naziunal svizzer, da la citad da



Cuira e da la societad istorica antiquara dal Grischun. Editur è l'archiv chantunal dal Grischun.

Il tom III (nov) dal cudesch da documents grischun ch'è gist cumpari cumpiglia ils documents che pertutgan il ter-

ritori dal chantun Grischun da l'onn 1273 fin 1303. Ils quatter fascichels dal III. tom (1273–1300) ch'èn cumparids da 1961–1970 èn vegnids elavurads cumpletmain da nov: Il dumber dals documents ha quasi pudì vegnir dublià.

Il material deriva da 107 archivs da la Svizra e da ses pajais vischinants. Stampads cun l'entir text èn documents che han in emittur u in adressat grischun u dal qual l'object sa chatta en il chantun Grischun. En furma da registes èn edids

ils documents che menziunan perditgas grischunas, garants u lieus d'emissiun grischuns u sumegliantas chaussas. Ils texts vegnan reproducids exactamain tenor l'original u tenor la meglra copia accessibla sco quai ch'ils principals moderns d'ediziun pretendan. Il commentari da materias, oravant tut l'identificaziun da las persunas e dals lieus è per part da character provisorio e na duai betg anticipar la perscrutaziun specifica. Resultada è ina solida ovra da funtaunas che serve a l'istorgia grischuna ed a la mediavistica internaziunala.

Enturn 1300 vegn il territori grischun dominà sper l'uestg cun ses domini che s'extenda sur las Alps ora da numerus signurs feudals seculars ed ecclesiastics sco represchentants da la suveranità.

Quels èn avant las dretgiras, ils vischinadis e las persunas singulas ils pli impurtants purtaders da la tradiziun scritta en pergaminas. En quest connex dominescha en il sid l'act notaril si da l'Italia ed en il nord la pergamina da sigil. Davent dal 13avel tschientaner cumparan ils documents da furma maschadada da l'Engiadina e dils documents tudestgs scrits oravant tut dals scrivants da l'uestg. La diversità territoriala, politica e culturala dal territori retic cundiziunescha ina multifariadada da las funtaunas en scrit che giustifitgescha er vinavant in interess spezial da la perscrutaziun.